

AKHBAR : KOSMO AHAD
MUKA SURAT : 7
RUANGAN : NEGARA

Kosmo! Ahad 20 OKTOBER 2024

Negara! 7

Kenaikan duti eksais disokong, langkah terbaik kurangkan isu diabetes, obesiti

Peluang tangani isu ketagih gula

Oleh SAFINA RAMLI


GEORGE TOWN – Persatuan Pengguna Pulau Pinang (CAP) menyifatkan langkah kerajaan menaikkan kadar duti eksais bagi minuman bergula adalah yang terbaik dalam mengurangkan pesakit diabetes dan menangani golongan obesiti.

Pegawai Pendidikan CAP, N.V. Subbarow berkata, tindakan kerajaan melancarkan 'perang terhadap gula dengan menaikkan kadar duti eksais secara berfasa mulai 1 Januari tahun depan adalah satu berita 'manis' untuk rakyat.

Menurutnya, langkah itu dilihat dapat mengatasi ketagihan minuman bergula di dalam botol dalam kalangan belia dan pelajar.

"Terima kasih Perdana Menteri. Berita yang sangat manis tanpa gula untuk rakyat Malaysia, khususnya kepada pengguna yang sering minum minuman yang mengandungi gula.

"Kadar yang dikenakan 40 sen seliter adalah munasabah selepas Malaysia menjadi antara



KERAJAAN akan menaikkan kadar duti eksais bagi minuman bergula secara berfasa bermula 1 Januari depan.
- GAMBAR HIASAN

negara paling obesiti di rantau Asia Tenggara dan gula adalah salah satu musuh utama penyakit tidak berjangkit," katanya di sini semalam.

Sementara itu, Sahabat Alam Malaysia (SAM) berkata, pihaknya menyambut baik peningkatan peruntukan kewangan ekologi kepada negeri-negeri dalam usaha perlindungan dan pemuliharaan daripada RM200 juta kepada RM250 juta.

"Bagaimanapun peningkatan ini masih tidak mencukupi untuk memberi insentif kepada negeri-negeri untuk mengekalkan hutan dan biodiversiti. Kami berharap jumlahnya lebih tinggi.

"Kami menyambut baik cukai karbon ke atas sektor besi dan keluli yang merupakan sektor yang menyumbang kepada pelepasan karbon tinggi. Ini adalah langkah yang positif," ujarnya.

Tambahnya, SAM turut menyokong langkah-langkah untuk menggalakkan orang ramai membeli peralatan elektrik yang cekap tenaga.